

**VENDIM**  
**Nr. 234, datë 19.11.2021**

**MBI FILLIMIN E PROCEDURËS PËR SHQYRTIMIN E APLIKIMIT TË  
SHOQËRISË OST SHA, PËR TARIFËN E TRANSMETIMIT TË ENERGJISË  
ELEKTRIKE, PËR VITIN 2022 DHE PERIU DHËN 2022–2024**

Në mbështetje të nenit 19, germa “c”, pika “i” dhe nenit 55, pika 1, të ligjit nr. 43/2015, “Për sektorin e energjisë elektrike”, të ndryshuar; të vendimit të Këshillit të Ministrave (VKM-së) nr. 244, datë 30.3.2016, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, të ndryshuar; të VKM-së nr. 620, datë 22.10.2021, “Për miratimin e kushteve për vendosjen e detyrimit të shërbimit publik, ndaj të licencuarve në sektorin e energjisë elektrike, gjatë gjendjes së emergjencës në furnizimin me energji elektrike dhe për përballimin e parandalimin e saj”; “Metodologjisë së llogaritjes së tarifave të transmetimit të energjisë elektrike”, miratuar me vendimin e Bordit të Entit Rregullator të Energjisë (ERE) nr. 180, datë 8.11.2017; dhe të neneve 15, 19, pika 1, germa “c”, nenit 21, pika 3, dhe nenit 22, pika 1 të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016; Bordi i ERE-s, në mbledhjen e tij të datës 19.11.2021, mbasi shqyrtoi relacionin nr. 144/5 prot., datë 17.11.2021, të përgatitur nga Drejtoria e Tarifave dhe Çmimeve “Mbi shqyrtimin e aplikimit të shoqërisë OST sh.a., për tarifën e transmetimit të energjisë elektrike, për vitin 2022 dhe periudhën 2022–2024”,

konstatoi se:

- Shoqëria Operatori i Sistemit të Transmetimit (OST sh.a.), me shkresën nr. 5215 prot., datë 31.8.2021, protokolluar me tonën nr. 914 prot., datë 2.9.2021, ka paraqitur në ERE kërkesën për aplikim për tarifën e transmetimit të energjisë elektrike, për vitin 2022, si dhe për periudhën 2022–2024.

- OST sh.a., me anë të shkresës nr. 5215/1 prot., datë 5.10.2021, protokolluar në ERE me nr. 914/1 prot., datë 6.10.2021, përditësoi koston e blerjes së energjisë për mbulimin e humbjeve të rrjetit të transmetimit, për efekt të situatës aktuale në tregun rajonal të energjisë elektrike.

- VKM-ja nr. 584, datë 8.10.2021, miratoi shpalljen e gjendjes së emergjencës në furnizimin me energji elektrike, në vijim të faktorëve të cilësuar dhe nga OST sh.a. në kërkesën e saj, por dhe nga faktorë të ndryshëm në të cilat ndodhen tregjet ndërkombëtare të energjisë, ku efekti në rritje i çmimeve të blerjes së energjisë ka impaktuar kostot për mbulimin e kërkesës për furnizim, por dhe të mbulimit të humbjeve të rrjeteve të operatorëve.

- ERE, me shkresën nr. 914/2, datë 11.10.2021, kërkoi nga OST sh.a. që aplikimi të konsideronte përditësimin e të dhënave, në përputhje me kërkesat e rregullores “Për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016; “Metodologjinë e llogaritjes së tarifave të transmetimit të energjisë elektrike”, miratuar me vendimin e Bordit të ERE-s nr. 180, datë 8.11.2017, si dhe parashikimet e VKM-së nr. 584, datë 8.10.2021, lidhur me shpalljen e gjendjes së emergjencës në furnizimin me energji elektrike.

- OST sh.a., me anë të shkresës nr. 5215/3 prot., datë 4.11.2021, protokolluar me tonën nr. 914/3 prot., datë 5.11.2021, është përgjigjur duke përcjellë një sërë të dhënash dhe dokumentesh të cilat kanë shërbyer për rillogaritjen e tarifës mesatare të transmetimit, për vitin 2022 dhe periudhën rregullatore 2022–2024.

- Totali i të ardhurave të kërkuara nga shoqëria OST sh.a., për vitin 2022, është në vlerën 11,876 milionë lekë, ku sasia e energjisë elektrike e parashikuar për t'u lëvruar në rrjetin e transmetimit është

7,720 gWh, duke rezultuar në një tarifë mesatare të transmetimit të energjisë elektrike prej 1.54 lekë/kWh, për vitin 2022 dhe për periudhën rregullatore 3-vjeçare 2022–2024, një tarifë mesatare transmetimi prej 1.47 lekë/ kWh ose një rritje prej 96% nga tarifa prej 0.75 lekë/kWh në fuqi, e miratuar nga ERE.

- ERE do të konsiderojë në përllogaritjen e të ardhurave të kërkuara, pritshmërinë mbi shlyerjen e detyrimeve të ndërsjella të shoqërisë, mbështetur në marrëveshjet përkatëse midis shoqërive.

- OST sh.a. duhet të dërgojë në ERE çdo të dhënë, argument apo dokumentacion mbështetës, të nevojshëm që do të kërkohej gjatë këtij procesi, gjithashtu duhet të plotësojë të gjitha kërkesat dhe detyrat që mund të lindin gjatë zhvillimit të seancave teknike dhe seancave publike me palët e përfshira dhe që impaktohen nga efektet e tarifës mesatare të transmetimit të energjisë elektrike.

- Analiza e kostove të realizuara por dhe të parashikuara, si dhe e treguesve teknik, ekonomik dhe financiar të operatorit të transmetimit, do të shërbejë për të vlerësuar nëse shoqëria është në rrethanat të cilat kërkojnë rivlerësimin e nivelit të tarifës mesatare të transmetimit e si rrjedhojë komponentët e të ardhurave të kërkuara/lejuara, në zbatim të përcaktimeve të “Metodologjisë së llogaritjes së tarifave të transmetimit të energjisë elektrike”, si dhe në mbështetje të përcaktimeve të rregullores “Për organizimin, funksionimin dhe procedurat e ERE-s”.

Për gjithë sa më sipër, Bordi i ERE-s

#### VENDOSI:

1. Fillimin e procedurës për shqyrtimin e aplikimit të shoqërisë OST sh.a. për tarifën e transmetimit të energjisë elektrike, për vitin 2022 dhe periudhën 2022–2024.

2. Drejtoria e Tarifave dhe Çmimeve të njoftojë aplikuesin dhe palët e interesit për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohej rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

**KRYETAR**  
**Petrit Ahmeti**